

यूहन्नां च्वःगु न्हापांगु पौ म्हसीका

थ्व पौलय् निता मू खँ दु – साहस यानाः परमेश्वर व वय्कःया काय् येशू ख्रीष्टलिसे छप्पँ जुइगु व थथे छप्पँ जुइगुपाखें अलग याइगु फताहा गुस्तयगु शिक्षापाखें बचय् जुयाच्चनेगु ख्याच्चः। थज्याःगु शिक्षा कथं संसारय् च्वंपिं फुक्क मनूत चिप जुइ, उकिं येशू धात्थेनं मनू खइ मखु। इमिगु शिक्षा कथं मुक्ति कायेत संसारयागु च्युताः तये म्वाः, अले मुक्ति काये धुंकूम्ह मनूयागु चालचलन न्हाथे जूसां ज्यु।

यूहन्नां थज्याःगु शिक्षाया विरोध यानाः येशू ख्रीष्ट धात्थेयाम्ह मनू हे खः धकाः बांलाक ध्वाथुइकातःगु दु। अले येशूयात विश्वास याइपिं व परमेश्वरयात माया याइपिं मनूतयसं थःथवय् नं माया यानाच्चनेमाः धकाः बःबियातःगु दु।

थ्व पौ ई.स. १० पाखे च्वःगु खः। यूहन्नाया सुसमाचार च्वःम्ह प्रभु येशूया चेला यूहन्नां हे थ्व पौ च्वःगु खः। व प्रभु येशूयात खंम्ह, थ्यूम्ह व वय्कःया सः न्यंम्ह चेला खः। थ्व पौ च्वःगु इलय् व बुरा जुइ धुंकूगु खः। अथे जुयाः वं थ्व पौलय् चेलातयत् मस्तयत् थें धयाच्चंगु दु।

धलः पौ

न्हाखँ १:१-४

जः व खिउँ १:५-२:२९

परमेश्वरया मस्त व शैतानया मस्त ३:१-२४

सत्य व दूबिद्वं ४:१-६

माया यायेगु ४:७-२१

विश्वासं त्याकेगु ५:१-२१

१ यूहन्ना

जीवन बीगु वचन

1 न्हापांनिसें जीवन बीगु वचन दु। थ्व हे वचनया बारे जिमिसं च्वयाच्चनागु दु। थ्व हे वचन जिमिसं न्यनागु नं दु। जिमिगु हे मिखां खनागु नं दु, बांलाक स्वयागु नं दु, ल्हातं थियागु नं दु।✧

2 गुबलय् थ्व वचन जीवन जुया: जिमिथाय् खनेदय्क: झाल, उबलय् थ्व जीवनयात जिमिसं खना, जिमिसं साक्षी बी, अले छिमित नं धाये। थ्व बा:याके दुगु अनन्त जीवन जिमिथाय् खनेदय्क: झाल।✧

3 जिमिसं न्यनागु व खनागु फुक्कं न्यंकागु दु। जिमिगु संगति बा: नाप व परमेश्वरया काय् येशू ख्रीष्टनाप दुगुलि छिमिसं नं जिपि नाप संगति याये फयेमा धका: थथे धयाच्चनागु ख:।

4 थथे जिमिसं छिमित च्वया: कयाच्चने दुगुलि जिपि तसकं लयता:।

परमेश्वर ज: ख:

5 परमेश्वरया काय् नं बियादीगु शिक्षा हे जिमिसं छिमित बियाच्चना। परमेश्वर ज: ख:। वय्क:याके खिउँ हे मदु।

6 झी वय्क:यागु संगतिइ दु धया: खिउँगुलिइ तु च्वनाच्चन धा:सा झीपिं ज्याखँ निताय् नं फताहा जुइ।

7 वय्क: ज: जु थें, झीपिं नं जलय् च्वनाच्चन धा:सा छम्ह मेम्हनापं संगतिइ जुइ, अले परमेश्वरया काय्यागु हिं झीगु दक्व पापपाखें शुद्ध यानादी।

8 झीसं “झीके पाप मदु” धका: धा:सा झीसं थ:पिन्त हे ध्वखा ब्यगु जुइ, अले सत्ययात मानय् मया:गु जुइ।

9 अय् नं झीसं थ:गु पाप मानय् यात धा:सा परमेश्वरं झीगु पाप क्षमा यानादी, अले झीगु मनय् च्वंगु फुक्क पाप नं च्वन्तुक हयादी, छाया:सा वय्क: भरोसा याये बह:म्ह व धर्मीम्ह ख:।

10 “झीसं गुबलें हे पाप मयाना” धका: धाल धा:सा झीसं परमेश्वरयात फताहा या:गु जुइ। अले वय्क:यागु वचन झीके दइ मखु।

2

येशू झीत ग्वाहालि याइम्ह ख:

1 अय् जि य:पिं मस्त, छिपिं ला जिम्ह मस्त थें ख:। छिमिसं पाप याये मते धका: थ्व खँ जिं च्वयाच्चनागु ख:। छुं जुया: छिमिसं पाप याये लात धा:सा निराश जुइ

मते, छायाधा:सा झीत ग्वाहालि याइम्ह येशू ख्रीष्टं बा:या न्ह्य:ने झीगु निति बिन्ति यानादी।

2 झीगु पापयागु निति जक मखु, संसारय् च्वंपिं फुक्क मनूतयगु पापया निति वयक: बलिदान जुयादीगु ख:।

3 परमेश्वरयागु आज्ञा मानय् याना च्वंसा जक वयक:यात बांलाक म्हस्यू धका: झीसं धाये फइ।

4 परमेश्वरयात बांलाक म्हस्यू धका: धया: वयक:यागु आज्ञा मानय् याना मजूम्ह मनू फताहा ख:। वयाके सत्य धयागु हे दइ मखु।

5 परमेश्वरयागु वचन मानय् यानाच्वंम्ह मनू जक धात्थें परमेश्वरया मायां जा:म्ह जुइ। थुकि हे झीपिं परमेश्वरया मनू ख: धका: सी दइ।

6 परमेश्वरया मनू ख: धका: धया जुइम्ह मनुखं येशू ख्रीष्ट थें जुइ फयकेमा:।

न्हगु आज्ञा

7 य:पिं दाजुकिजापिं, जिं छिमित च्वयाच्वनागु थ्व आज्ञा न्हगु मखु, पुलांगु हे ख:। थ्व आज्ञा परमेश्वरयात विश्वास या:बलय् निसें छिमित न्यंकूगु ख:, आ: नं न्यनाच्वंगु हे दु।*

8 अयनं थन धा:सा जिं छिमित छगू न्हगु हे आज्ञा च्वयाच्वनागु दु। थ्व सत्य ख: धका: ख्रीष्टपार्वे हे सी द:व:गु दु, छायाधा:सा खिउँ तना वनाच्वंगु दु, अले धात्थेंगु ज: लुयाव:गु दु।

9 ख्रीष्टं जिगु नुग: यचुक सिलादीगु दु धका: धया जुइम्ह मनुखं दाजुकिजापिन्त हेला यानाच्वन धा:सा आ: तक नं वयागु नुग: हाकुसे हे च्वं नि।

10 दाजुकिजापिन्त माया यानाजुइम्ह मनूयागु नुग: ख्रीष्टं यचुकादीगु दु धका: सी दु, उकिं वयागु नुगलय् हाकु धयागु हे दये फइ मखु। अयजूगुलि वं सुयातं पाप याकी मखु।

11 अयनं दाजुकिजापिन्त हेला यानाजुइम्ह मनू खिउँथाय् लाइ। अले खिउँथाय् हे जुइ। वं थ: गन वनाच्वना धका: सी मखु, छायाधा:सा वयागु मिखा खिउँगुलि कां जुइ।

12 अय् जि य:पिं मस्त,

ख्रीष्टयागु नामं याना:

छिमिसं या:गु फुक्क पाप

परमेश्वरं क्षमा यानादिल।

13 जिं बौपिन्त नं थ्व खँ
 च्वयाच्चनागु खः,
 छाय्धाःसा छिमिसं
 न्हापांनिसें दीम्ह
 ख्रीष्टयात बांलाक म्हस्यू।
 शैतानयात त्याके धुकूपिं
 ल्याय्म्ह व ल्यासेपिन्त नं
 जिं थ्व खँ च्वयाच्चना।

14 मस्तयूसं नं झीं परमेश्वर
 बाःयात म्हस्यूगुलि छिमित नं
 जिं थ्व खँ च्वयाच्चनागु खः।

बौपिन्सं न्हापांनिसें दुम्ह परमेश्वर
 बाःयात म्हस्यूगुलि
 जिं थ्व खँ च्वयाच्चना।
 बल्लाःपिं ल्याय्म्ह व ल्यासेपिं,
 छिमिगु नुगः परमेश्वरयागु
 वचनं जायाच्चवंगु दु।

उकिं छिमिसं शैतानयात
 त्याके फत।

उकिं जिं छिमित नं
 च्वयाच्चनागु दु।

संसारयात माया याये मते

15 थ्व संसारयात माया याये मते। थ्व संसारय् च्वंगु चिजबिजयात नं ल्वःवंके मते। संसारयात माया यानाजुइम्ह मनुखं परमेश्वरयात माया याइ मखु।

16 थ्व संसारय् च्वंगु फुक्क ज्याखँ गथे बांमलाःगु मभिगु ज्याखँ याये मास्ति वयकेगु, मिखां खंक्व काये मास्ति वयकेगु, अले तःधंछुयाः फुइँफौय् यानाजुइगु। थ्व फुक्क परमेश्वर बाःयापाखें मखु, संसारयापाखें हे दयावःगु खः।

17 थ्व संसार व थ्व संसारय् च्वंगु मनूतयूसं यय्का जुइगु नं फुक्कं मदया वनीतिनि। तर परमेश्वरयागु इच्छा कथं जुइम्ह मनू न्हाबलेँ दयाच्चनी।

ख्रीष्टया शत्रु

२ थेस २:१-१२

18 अय् जि यःपि मस्त, थ्व संसार याकनं हे फुना वनिन। ख्रीष्टया शत्रु वइतिनि धकाः छिमिसं न्यनातःगु दु। ख्रीष्टया शत्रुत खने दयावये धुंकल। अय्जूगुलि थ्व संसार याकनं हे फुना वनिन धकाः झीसं सीके फु।

19 इपिं झीगु पुचलं पिहां वने धुंकल, छायाःसा इपिं झी मनूत मखु। इपिं झी मनूत खःसा इपिं नाप हे च्वनीगु खः। झीगु पुचलं पिहां वंगुलि इपिं झी मनूत मखु धकाः सीदत।

20 ख्रीष्टं छिमित पवित्र आत्मा बियादीगु दु, उकिं छिपिं थुपिं थें मखु। अय्जूगुलि सत्य छु खः धयागु छिमिसं स्यू।

21 छिमिसं सत्ययात मस्यु धकाः जिं थ्व च्वयाच्वनागु मखु। सत्ययात स्यूगुलि हे जिं थ्व च्वयाच्वनागु खः, छायाःसा सत्यपाखें मखुगु खँ पिहां वइ मखु धकाः छिमिसं सि हे स्यू।

22 अयसा मखुगु खँ ल्हाना जुइमह सु खः? येशू धाःमह मुक्ति बीमह ख्रीष्ट मखु धकाः धया जुइमह मनू हे मखुगु खँ ल्हाइमह खः। थज्याःमह मनू ख्रीष्टया शत्रु खः। थज्याःमह मनुखं परमेश्वर बाः व वय्कःया काय् निम्हयसितं थःनाली मखु।

23 परमेश्वरया काय्यात मानय् मयाइमह मनुखं परमेश्वर बाःयात नं मानय् याइ मखु। अले वय्कःया काय्यात मानय् याइमह मनुखं परमेश्वर बाःयात नं मानय् याइ।

24 अय्जूगुलि छिमिसं न्हापांनिसें न्यनातःगु परमेश्वरयागु वचनयात दुनुगलय् तयाति। अथे याःसा छिपिं परमेश्वर बाः व परमेश्वरया काय् नाप च्वने दइ।

25 ख्रीष्टं झीत बी धकाः धयादीगु अनन्त जीवन थ्व हे खः।

26 थज्याःपिं ख्रीष्टया शत्रुतय्सं छिमित मखुगु लँय् यंकी धकाः कनाबीत थ्व खँ च्वयाच्वनागु खः।

27 अयनं ख्रीष्टं छिमिगु नुगलय् पवित्र आत्मायात तयादीगु दु, उकिं सुनानं छिमित स्यने माःगु मदु। पवित्र आत्मां छिमित फुक्कं स्यनादी। वय्कः सत्य खः, गुबलें मखुगु खँ ल्हानादी मखु। पवित्र आत्मां गथे स्यनादिल, अथे हे यानाः छिपिं ख्रीष्टनाप च्वनाच्वँ।

28 अय् जि यःपि मस्त, ख्रीष्टनाप च्वनाच्वँ। अले जक ख्रीष्ट हानं थन झायादीबलय् झीपिं ग्याये माली मखु, अले वय्कः खनाः लज्या चाये माली मखु।

29 ख्रीष्ट भिंमह खः धकाः छिमिसं स्यू। अय्जूगुलि छिमिसं भिंगु बांलाःगु जक यानाजुइपिं मनूत परमेश्वरया सन्तान खः धकाः सीकाति।

3

परमेश्वरया सन्तान

1 स्व, परमेश्वर बा:नं झीत गुलि माया यानादीगु दु। उकिं हे झीत परमेश्वरया सन्तान धका: धा:गु ख:, धात्थे ख: नं ख:। अयज्गुलि हे थ्व संसारयापि मनूतयसं झीत म्हमस्यगु, छायाधा:सा इमिसं वय्क:यात म्हमस्यू।*

2 अय् जि य:पिं मस्त, आ: ला झीपिं परमेश्वरया सन्तान ख: धका: झीसं स्यू। अयनं लिपा झीपिं गज्या:पिं जुइ धयागु खँ झीत कना मदीनि। अयसां ख्रीष्ट झायादीबलय् झीपिं वय्क: थें हे जुइतिनि धका: झीसं स्यू। अले तिनि वय्क: गथे च्वं धका: झीसं खनी।

3 थथे ख्रीष्टयाके आशा यानाच्चंपिं वय्क: थें पवित्र जुया: च्वनेमा:।

4 सुनां पाप याइ वं व्यवस्था मानय् मया:गु जुइ, छायाधा:सा व्यवस्था मानय् मयायेगु हे पाप ख:।

5 झीगु पाप मदय्केत हे ख्रीष्ट झायादीगु ख:। ख्रीष्टयाके पाप द हे मदु।*

6 ख्रीष्टयाके च्वनाच्चंपिन्सं पाप याइ मखु। पाप यानाच्चनीम्ह मनुखं ख्रीष्टयात गुबलें हे खनी नं मखु, म्ह नं सी मखु।

7 अय् जि य:पिं मस्त, छिमित सुनानं मखुगु लँय् यंके मफयेमा। गथे ख्रीष्ट धर्मी ख: अथे हे भिगु ज्या याइपिं मनूत नं धर्मी ख:।

8 शैतानं न्हापानिसें पाप याना वयाच्चंगु दु, उकिं पाप यानां तुं च्वनीपिं मनूत नं शैतानया मनु ख:। अथे जूगुलि शैतानयागु ज्या स्यंकेत परमेश्वरया काय् थन झायादी मा:गु ख:।

9 परमेश्वरयापाखें बूमहयसिनं पाप यानां तुं च्वनी मखु, छायाधा:सा इपिं वय्क: थें जुइ। अले वय्क: हे इमि बा: जूगुलि नं इमिसं पाप यानां तुं च्वने फइ मखु।

10 परमेश्वरया सन्तान व शैतानया सन्तान थुकिं हे बांलाक सी दइ। बांला:गु भिगु ज्या मयाइम्ह, अले थ: दाजुकिजापिन्त माया मयाइम्ह मनु परमेश्वरया सन्तान मखु।

थ:थवय् माया याना च्वँ

11 थ:थवय् माया यानाच्चनेमा: धका: धा:गु खँ ला छिमिसं न्हापानिसें हे न्यनात:गु दु।*

12 झीपि कयिन थें जुइ मज्यू। कयिन शैतानया मन् जूगुलि वं थः हे किजा हाबिलयात स्यात। कयिनं थः हे किजायात छाया स्यात? कयिन शैतानया मन् जूगुलि वया किजां भिगु बांलाःगु याना जूगु स्वये मफयाः वं थः किजायात स्यात।*

13 यःपिं दाजुकिजापिं, उकिं थ्व संसारयापिं मनूतयसं छिमित हेला यात धकाः छिपिं अजू चायेमाःगु मदु।

14 झी मृत्युं जीवनय् न्हाये धुन धयागु थुकिं हे सी दु। झीसं थः दाजुकिजापिन्त माया याना। थः दाजुकिजापिन्त माया मयाइम्ह मन् कालयागु ल्हातय् हे लानाच्चनी।*

15 दाजुकिजापिन्त हेला याइम्ह मन् ज्यानमारा खः। अले ज्यानमारायाके अनन्त जीवन दइ मखु।

16 थुकथं झीसं माया धयागु छु खः धकाः स्यू – झीगु निति ख्रीष्ट सिनादिल, उकिं झीसं नं झी दाजुकिजापिनिगु निति सीत तकं लिफः स्वये मज्यू।

17 तःमिम्ह मनुखं थः दाजुकिजापिनि नये मखं धकाः सियाः नं इमित माःगु ग्वाहालि मब्यूसा, अज्याःम्ह मनुखं परमेश्वरयात माया याना धकाः गथे धाये फइ?

18 अय् जि यःपिं मस्त, झीसं म्हुतुं जक माया याना धयां मज्यू। ज्याखँय् नं धाथेगु माया यानाक्यने फयेमाः।

19 थुकिं हे झीपिं सत्यपिं खः धकाः सीका धायेफु। अले परमेश्वरया न्हाःने दुक्कं च्वने फु।

20 झीत झीगु हे नुगलं दोषी ठहरय् याइ धाःसा परमेश्वर ला झीगु नुगः स्वयाः नं तःधं। वय्कलं मस्यूगु छुं नं मदु।

21 अय्जूगुलि यःपिं दाजुकिजापिं, झीगु मनं झीत दोषी ठहरय् मयाःसा झीपिं परमेश्वरया न्हाःने ग्याये माली मखु।

22 वय्कलं धयादीगु मानय् जुयाः वय्कःयात यःयःगु जक याना जूसा वय्कःयाके न्हागु फ्वंसां झीत बियादी।

23 वय्कलं झीत आज्ञा यानादीगु थ्व हे खः – वय्कःया काय् येशू ख्रीष्टयात झीसं विश्वास यायेमाः। दाजुकिजापिन्त माया यानाच्चनेमाः। थथे हे याना च्वं धकाः ख्रीष्टं नं झीत धयादीगु दु।*

24 परमेश्वरयागु आज्ञा मानय् यानाच्चंम्ह मन् वय्कः नाप दइ, अले वय्कः व नाप दइ। झीगु नुगलय् पवित्र आत्मा तयादीगुलि झीसं थ्व स्यू।

4

सत्य व असत्य आत्मा

1 यःपि दाजुकिजापि, आत्मा दु धकाः धयाजुइपि न्ह्याम्हयसित नं विश्वास याये मते। न्हापां परमेश्वरयागु आत्मा खः मखु धकाः नि जाँचय् याना स्व, छायाःसा यक्व हे फताहा अगमवत्तात खने दया वयाच्वंगु दु।

2 सुनां ख्रीष्ट धात्थे हे मनू जुयाः झायादीगु खः धकाः धाइ व मनूयाके परमेश्वरयागु आत्मा दु। थुकिं हे परमेश्वरया आत्मा म्हसी।

3 सुनां ख्रीष्ट मनू जुयाः झायादीगु मखु धकाः धाइ, व मनूयाके ख्रीष्टया शत्रुयागु आत्मा दु धकाः सीकि। व वइ धकाः छिमिसं न्यनातःगु दु। व आः नं संसारय् दनि।

4 अय् जि यःपि मस्त, छिपि परमेश्वरया मनूत खः, उकिं अज्याःपि फताहा अगमवत्तातयत छिमिसं बुकाछवःगु दु। थ्व संसारय् च्वंम्ह आत्मा स्वयाः छिमिगु नुगलय् च्वनादीम्ह आत्मा तसकं बल्लाः।

5 इमिसं ला थ्व संसारय् च्वंगु खँ जक स्यने फु। अले संसारयापि मनूतयसं इमिसं धाःगु खँ मानय् नं जुइ। अथे जूगुलि इपि फुक्कं थ्व हे संसारयापि मनूत खः।

6 झीपि धाःसा परमेश्वरया मनूत खः, उकिं वय्कःयात बांलाक म्हस्यूपिन्सं झीगु खँ न्यनी। वय्कःया मनूत मखुसा झीगु खँ नं इमिसं न्यनी मखु। थथे झीसं परमेश्वरं धाःगु व मनूतयसं धाःगु खँ सीके फइ।

परमेश्वर माया खः

7 यःपि दाजुकिजापि, झी थःथवय् माया यानाच्वनेमाः, छायाःसा माया धयागु परमेश्वरपाखे वःगु खः। अयजुगुलि माया यानाजुइम्ह मनुखं वय्कःयात बांलाक म्हस्यु, उकिं थज्याःपि मनूत वय्कःया सन्तान खः।

8 परमेश्वर प्रेम खः, उकिं माया याये मसःम्ह मनुखं वय्कःयात म्हसी मखु।

9 परमेश्वरं झीत माया यानादीगु दु धकाः थुकिं हे सी दु – झीत जीवन दयेमा धकाः वय्कलं थः याकः काय्यात संसारय् छवयाहायदिल।

10 झीसं परमेश्वरयात माया यानागु मखु, बरु वय्कलं हे झीत माया यानादीगुलि झीगु पाप क्षमा यानाबीत थः हे काय्यात बलिदान यायेत छवयाहायदिल – माया धयागु थ्व हे खः।

11 यःपि दाजुकिजापि, परमेश्वरं हे झीत थथे माया यानादिल धाःसा झी थःथवय् नं माया यानाच्वनेमाः।

12 परमेश्वरयात सुनानं खंगु मदुनि। तर झी थःथवय् माया याना च्वंसा वय्कः झीगु नुगलय् च्वनादी। अले वय्कःयागु मायां झी जाइ।☆

13 वय्कलं झीगु नुगलय् आत्मा तयादीगुलि वय्कः झीगु नुगलय् च्वनादीगु दु धकाः झीसं सी। अले झी वय्कःयाके दु धकाः नं सी।

14 थ्व संसारयापि मनूतयत् मुक्ति बीत परमेश्वर बाःनं थःकाय्यात छवयाहयादीगु जिमिसं खना। थ्व हे खँ जिमिसं कनावयाच्वनागु खः।

15 येशू परमेश्वरया काय् खः धकाः धया जुइम्ह मनूयागु नुगलय् परमेश्वर च्वनादी। व हे वय्कःयाके च्वंम्ह खः।

16 अले झीत परमेश्वरं माया यानादिल धकाः झीसं सि नं स्यु, अले विश्वास नं याना।

परमेश्वर माया खः, उकिं माया यानाजुइम्ह मनूयागु नुगलय् वय्कः दयाच्वनी। अले व नाप दइ।

17 थुकथं झी मायां जाये धुंकाः न्याय याइबलय् मग्यासे परमेश्वरया न्ह्यःने वने फइ, छायाःसा वय्कः गथे खः थ्व संसारय् झी नं अथे हे खः।

18 माया याइपि ग्याये म्वाः। धात्थेयागु मायां ग्याःचिकु मदय्का छवइ। ग्याःम्हयसित सजाँय बी, छायाःसा ग्याइपिन्के धात्थेयागु माया दइ मखु।

19 परमेश्वरं झीत न्हापालाक माया यानादीगुलि झीसं नं वय्कःयात माया यानागु खः।

20 वय्कःयात जिं माया यानागु दु धकाः धया जुइम्ह मनुखं दाजुकिजापिन्त हेला याना जूसा थज्याःम्ह मनू फताहा खः धकाः सीकि। मिखां खंपि थः दाजुकिजापिन्त माया मयाइम्ह मनुखं मिखां मखंम्ह परमेश्वरयात माया याये फइ मखु।

21 अयजूगुलि ख्रीष्टं झीत थथे याना च्वँ धकाः धयाथकूगु खः – “परमेश्वरयात माया याइम्ह मनुखं थः दाजुकिजापिन्त नं माया यायेमाः।”

5

संसारयात गथे यानाः त्याकेगु?

1 येशूयात मुक्ति बीम्ह ख्रीष्ट खः धकाः विश्वास याना जूपि मनूत परमेश्वरया सन्तान खः। परमेश्वर बाःयात माया याइम्हयसिनं वय्कःया काय्यात नं माया याइ।

2 वय्कःयात माया याना च्वंसा व वय्कःयागु आज्ञा मानय् याना च्वंसा झीसं धात्थे वय्कःया मस्तयत् माया यानाच्वनागु दु धकाः सी दइ।

3 परमेश्वरयागु आज्ञा मानय् यायेगु हे वय्कःयात माया यायेगु खः। वय्कःयागु आज्ञा मानय् यायेत थाकु मजू।*

4 वय्कःया सन्तानतय्सं थ्व संसारयात बुकी। वय्कःयात विश्वास यानागुलि झीसं संसारयात त्याके फइ।

5 सुनां संसारयात त्याके फइ? येशूयात परमेश्वरया काय् खः धकाः विश्वास यानाजुइपिन्सं जक थ्व संसारयात त्याके फइ, मेपिन्सं त्याके फइ मखु।

6 येशू ख्रीष्ट थ्व संसारय् झायादीगु निता दसि दु – लः व हि। मनु थें जुयाः बाप्तिस्मा कयादीगु दसि खः – लः, अले हानं मनूतयग्गु पाप क्षमा यायेत येशू सिनाः थःगु हि हाय्कादीगु दसि खः – हि। सत्यम्ह पवित्र आत्मां नं थ्व हे खँ साक्षी बियादिल।

7-8 येशू परमेश्वरया काय् खः धकाः थ्व स्वतां बांलाक कयं – पवित्र आत्मा, लः व हि।

9 झीसं मनुखं हे ब्यगु साक्षीयात पत्याः याना। परमेश्वरं ब्यगु साक्षी झन पत्याः यायेबहः जू। वय्कलं थः हे काय्यागु साक्षी बियादिल।

10 अय्जगुलि वय्कःया काय्यात विश्वास यानाच्चंपिं मनूतय्सं थ्व खँ सत्य खः धकाः स्यू। परमेश्वरयात विश्वास याइ मखुपिन्सं वय्कःयात फताहा ताय्की, छायाधाःसा परमेश्वरं थः काय्यागु बारे बियादीगु साक्षीयात इमिसं विश्वास याइ मखु।

11 थ्व खँयागु दसि थ्व हे खः – परमेश्वरं झीत अनन्त जीवन बियादीगु दु। थ्व अनन्त जीवन वय्कःया काय्याके दु।*

12 सुयाके काय् दु वयाके थ्व अनन्त जीवन दइ, सुयाके परमेश्वरया काय् मदु वयाके थ्व अनन्त जीवन दइ मखु।

अनन्त जीवन

13 परमेश्वरया काय् येशूयात विश्वास याःगुलि छिमिके अनन्त जीवन दु धयागु खँ थुइमा धकाः थ्व खँ छिमित च्वयाच्चनागु खः।

14 वय्कःया इच्छा कथं झीसं न्हागु फ्वसां वय्कलं बियादी धकाः झीसं स्यू। उकिं झीपिं वय्कःया न्ह्यःने वनेत गयाये माःगु मदु।

15 झीसं प्रार्थनाय् न्हागु फ्वसां वय्कलं झीगु खँ न्यनादी धकाः स्यूगुलि वय्कःयाके फ्वनागु वय्कलं बियादी धुंकल धकाः नं स्यू।

16 सुनानं थः किजायात सीम्वाःलिगु पाप यानाच्चवंगु खंसा वं थः किजायालागिं प्रार्थना यायेमाः। परमेश्वरं वयात जीवन् बियादी। तर थ्व धाःसा सीम्वाःलिगु पाप याःपिनिगु नितिं जक खः। सी मालिगु पाप नं दु। तर जिं छिमित थुक्रिया लागि प्रार्थना या धकाः धाये मखु।

17 मभिगुं बांमलाःगु ज्याखँ फुक्कं पाप हे खः। अयनं सीम्वाःलिगु पाप नं दु।

18 परमेश्वरया सन्तानतयसं पाप यानां तुं च्वनी मखु। वय्कःया कायनं अज्याःम्ह मनूयात शैतानं थी मफय्क बचय् यानातयादी।

19 झीपिं परमेश्वरया सन्तान खः, अले थ्व संसारय् च्वपिं मेपिं फुक्क मनूत शैतानया मनूत खः धकाः नं झीसं स्यू।

20 परमेश्वरया काय् झायाः झीत धात्थेंयाम्ह परमेश्वर म्हसीकादिल। थ्व खँ झीसं स्यू। धात्थेंयाम्ह परमेश्वरया काय् येशू ख्रीष्टनाप झीगु जीवन नं प्यपुनाच्चवंगु दु। थ्व हे सत्य परमेश्वर खः, अले हानं थ्व हे परमेश्वर अनन्त जीवन नं खः।

21 उकिं अय् जि यःपिं मस्त, मूर्ति पुजापाखें तापाक च्वँ।

Newar
Newar: Newar (Bible)

copyright © 2024 Nepal Bible Society and Wycliffe Bible Translators, Inc.

Language: Newar

Contributor: Wycliffe Bible Translators, Inc.

All rights reserved.

2025-05-17

PDF generated using Haiola and XeLaTeX on 16 May 2025 from source files
dated 17 May 2025

838cc630-4ccf-5055-be45-10a98a141cc7